

富平县志

一
函
十
册
函

富平縣志稿卷九

列女

王貞女名仙花木截口王生輝女少字元亨堡溫振邦之孫
繩武溫家貧相距不數里嘉慶二十四年繩武病歿計聞女
欲奔喪生輝怒叱之則日夜潛泣叔與父謀別字女竊聞之
乘間趨溫宅哭柩前願事祖舅姑終身生輝踵至促令歸女
以死自誓振邦夫婦惕以貧苦貞女曰將來我自有道理遂
畱之時年甫十三耳聞處閨壺晝夜針黹以盡養後四年振
邦歿喪葬盡禮孝達都邑大吏助以金邑紳耆代營田宅至
道光十六年祖姑病革禱天割臂雜藥進歿後立嗣營葬畢

卽跪繢窗櫺間守節十八年其事實詳師玉山從容就義歌
唐陶山方伯爲作傳辛筠谷學使有詩張介侯有記附貢生
師中吉爲建碑表墓迎主入本邑節烈祠

劉貞女荆儀堡劉述祖女幼字盤龍堡張根未婚而根亡女
奔喪守節越年餘其家舉葬根貞女欲同穴死眾阻未果旣
歸家投井以殉焉邑令江開給貞性天成匾額且請

旌焉

張貞女縣新移村張化圖孫女少字到賢鎮雷成宇之次孫
興灝爲媳稍長緣親情養於雷氏雷家世讀書成宇生平力
學髦年入泮長孫鈺舉孝廉女夙遵姆訓卽以賢孝稱時嘉

慶二十二年女十七歲興灝年亦十七已定於是歲十二月
合卺不意是月初興灝病歿女慟哭欲殉祖父母及親族苦
勸之始成服詣靈筵自誓終身守貞

魚貞女蒲城縣蘇坊文學連升女孝廉飛龍之妹也縣東鄉
沐惠村文學楊惟金與魚家世舊好因許其姪儒童際會爲
繼室年十六道光二年際會病故訃聞女竊告母欲往弔連
升聞而異之心許而未卽出口也女日夜涕泣於母側諄切
爲言連升憐其志誠遂許之爲擬作祭文情摯而義切聞者
傷焉乃送女致祭歸楊事翁姑處妯娌以賢孝聞

劉貞女縣東仁義坊農家春禮之長女幼字前村西堡王喜

官之長子理爲婦劉家貧女幼養於王氏道光二年三月理病春禮妻視之知理危篤夜宿貞女房謂之曰王生病已十分只在早晚間耳女含淚不語夜將半忽起挑燈梳粧收髮辮爲笄飾母驚醒問之對曰兒梳粧爲王家婦兒不歸矣母哭而婉諭之誓不改比天明其兄來視理疾見妹改妝狀疑翁家之強爲也忿而爭論理之父母曰此非吾所迫乃爾妹自爲之耳其母出言其故乃垂首無言而去時三月二十二日也是日理卒貞女卽服斬衰哭泣以婦禮守喪是年十八歲

張貞女蒲城縣蘇坊永祿之女名秀蘭少字富平西仁義坊

李逢昇之孫守禮之子繩祖道光二年繩祖年十四忽染疾至三月初三日故計聞女亦十四泣告父母欲法魚氏之女往弔父母憐其意懇許之卽於繩祖首七赴弔痛哭擬殉喪次夕夢繩祖止之請代事母卒以孝聞巡撫鄂山奏請

旌年八十卒

秦貞女楊長庚之聘妻渠上党楊堡人夫死奔喪養翁姑孝敬備至家酷貧茹苦含辛恬然自若邑令曹士鶴學使葛芋農薛任臣捐俸倡募以給其衣食迨翁姑歿甫葬卽自經時值回亂未及

旌有義貲公啟

紀氏八聯劉家坡劉積慶妻于歸二年積慶以同治二年瘟疫死時避賊難在耀州暫寄埋於耀三年賊平歸里謀遷葬其夫別購棺屍已腐化人皆惡其臭惡難近氏親爲整理骨殖一指一髮安置如法葬時欲撲墓殉家人力阻歸卽服毒死報官請卹氏係洪水堡紀興福妹嗣其小妹及嫂劉亦因捻匪亂投井殉節

李貞女名仙娥官莊堡慶年女幼字上官村張百忍未嫁而夫歿欲奔喪父阻之適父出外乘間趨夫家哭之盡哀旋服毒死於柩側時同治六年捻逆亂未得報請

王氏赤兔坡邵全信妻全信業農而情家極貧氏爲人傭針

工以養夫始終無怨言鄰婦聳其規勸之氏曰勸之不勤吾安吾命而已光緒三年關陝旱荒饑民相食氏素賢而巧於針黹富室憐其饑贈以挂麪少許適夫他出未歸氏不忍獨食俟夫數日竟餓死麪猶存夫歸始悟號哭而死村人憐而殮葬之

黃氏侯家山仁義村趙致和妻十六歸趙姑多病不能下牀者十一年氏朝夕奉侍始終無懈怠容卽歸寧父母不肯一宿父或畱之氏曰父幸康強奈姑病臥牀蓐他人事之稍拂意恐傷姑心耳卒因調養病以痊舅之兄弟四夫之兄弟五內外上下廿餘口氏皆善處無閒言其夫之從父行四者素鹵

莽後娶繼室甫入門卽戒曰一家大小任爾言短長惟姪婦黃吾信其賢若和睦卽爾等過也後其夫弟妻死氏撫姪與子愛教無異同治十三年氏因勞致疾服藥靡瘥其次女年十七猶未嫁割左手小指二節入藥病忽愈三月疾復發至於大病而亡享年四十三卒時舅姑年逾七旬爲之氣結者纍日親戚聞者均爲下淚稱趙氏賢婦死漆沮河東西無與爲比者女後字張廷楨

許氏白馬村王萬林妻年十二童養於萬林家萬林無父母惟祖母存越一年萬林出外貿易祖母旋失明氏母家以其年及笄萬林無音耗欲別嫁之氏以祖姑瞽無人奉養且願

待夫爲辭父初聽之年二十五父恐女終至無依意欲改適
迫其歸寧父私匿女裙不欲令歸氏知之因假鄰婦裙着歸
嗣後省親裙不離身朝往而暮還無敢宿焉年三十二適祖
姑歸視母家覓鄰婦爲作伴二鼓後萬林歸叩門自通姓名
鄰婦欲啟戶氏止之曰二十年在外昏夜忽來真偽難辨隔
門告以祖母客去令其暫假宿他處明日祖母歸集眾認之
始行合卺禮越一年氏生一子萬林復出外絕無音耗氏事
祖姑生養死葬悉出績紡鄰里鄉黨稱賢家雖極貧究無異
志撫子成立且完娶焉

姚氏西鄉安家灣生員卜師夏妻年二十五夫亡家貧無子

女門內無所依倚或勸之嫁姚曰豈有學校士人妻夫死而再醮忍腆學校而背亡夫耶先師夏死時值同逆亂鄉人各逃生命寄埋無棺木姚以織績自活積資數年始買棺歛親爲整骨以夫生前所愛書殉其葬里人有欲購其書者皆謝却之

李氏陳宗舜妻通關里七甲李懷珍之女年十六于歸陳完姻後不數日夫服賈四川寄氏於母家光緒十年九月夫病歸氏親理湯藥日夜憂泣病革謂氏曰我死家無所依汝他適不汝怨氏泣誓願以身殉十二月十二日宗舜歿氏託族兄宗堯購棺親爲含殮居喪次哀毀骨立越十日葬是時氏

欲殉於墓隨同送喪戚族力爲勸阻不得暇歸家五日伺兄嫂外出起服毒死年二十一紳耆呈報邑侯涂君親臨祭奠並助資以作葬費又詳請

旌表準建坊入祠此光緒十一年事也

萬氏李生吉妻年十九夫亡足不出門戶夫服三週潛挾小刀於墓前自刎爲親人所覺力阻歸後戚容漸釋家人弗防是夜整理衣裙服毒酒而死時張邑侯其翰李縣丞世欽並諭訓同至其家弔祭焉

何氏石聯璧妻受聘未笄而夫亡年十六聞喪欲往弔父母禁弗許復別議婚於方氏女終日鬱鬱不言一日偕母往郭

外挑菜攜筐先行母後從之出郭野菜徧地弗顧也徑趨石家母追不及至牽女衣逼歸女哭云此兒生死地可入而不可出也方姓聞之控於謝邑侯長清謝哀其志批仍歸石守貞俟他日爲陳請女不憚艱苦日操井曰孝事翁姑數十年足未出門戶年已四旬髻而不髻依然女子粧故鄰人咸以女兒婆呼之後翁姑俱沒女曰生胡爲哉一夜無疾而卒邑紳具稟學使錫以匾額復請

旌

張氏房居信妻十六于歸事翁姑以孝聞未三年而夫亡氏以守義自誓葬後設夫木主祭於房中每食共具若生三載

足未出門夫三週氏祭墓痛哭見者莫不流涕夕歸舉家就寢扃戶自剗其項詰旦戶未啟家人視之見氏仰卧牀上衣裙整齊但項下微有血痕而已

柳氏劉緒祖妻夫爲髮逆所害事孀姑立志不移年荒無食雖日不舉火敬姑猶篤無片言怨姑以貧難度日欲奪而嫁之誓以死守迨姑死氏亦投井自盡時年二十六歲

李氏吳三常妻甘井李某女幼字三常嫁有日矣其父母心忽變欲改婚意甚堅非語言所能動甘井去吳家二里許女乘閒奔夫家未逾年而三常歿氏取猶子以爲嗣十餘年不出大門外鄰里鄉黨咸敬禮之

紀氏劉隆棟妻年二十五孀老姑在堂奉事極孝值歲饑饉
姑不飽己不忍飽姑不煖己不忍煖及同治二年四月閒姑
病革將歿同逆擾亂村人皆先遠避亦喚氏隨之氏曰棄姑
獨逃則心喪矣雖生何益自依牀蓐五晝夜不離賊營附近
相去里許獨不入其村人咸以爲有神靈呵護也今年已七
旬有餘撫姪爲嗣

房氏劉步敏妻年十七于歸時同治三年也步敏向在三原
貿易至六年十一月初九日歸家病故氏年二十有二無子
獨身居喪蓬頭垢面粧奩毀棄葬後設靈位於一淨室每日
飲食必先薦而後始食卽出入必倚位告訴事死猶生三年

之久如一日焉比及禪祭之辰與諸姑設筵談笑若無傷悲之態當晚整衣束髮以刀刎喉卧牀而死次辰家人見其猶未出戶往視之屍在牀惟項下有刀痕無血污狀面貌如生宗族鄉黨並傳烈婦之死與常人異時值兵燹兼饑荒未爲請

旌

田氏小田村士信女幼字王夫遠遊無音耗于歸之日卽空房立志待夫誓不他適俟二十餘年氏亦四十餘矣人傳夫在外已歿有勸以他適者則怒叱曰汝輩欲逼我削髮爲尼耶鄉里咸敬之九十七卒於母家學憲許有貞壽堪欽額

任貞女縣緱村童子孫殿試之聘妻殿試十三而殤女奔喪
及百日覓死不得期年祭畢自經年十五時咸豐十年正月
初五日也邑侯江開以其事 上聞且植柏於墓約同人作
詩以表之

安烈女名裙釵奧家窰人年十五同治癸亥正月同逆入境
與父丹桂同匿深谷中爲時旣久丹桂出探賊爲賊所執將
殺之丹桂哀號女聞之出谷投賊願代父死賊不應以刀砍
之女以身蔽父乃命二賊挾持女竟殺丹桂女見父被殺哭
且罵賊欲污之怒批賊頰憤罵愈厲賊斷其舌猶作罵狀賊
竟殺之